

BEGALATA

É Kálara Begalata

Mebéránn

1 ¹Ma Pablo, apostol (se á mfá bot ngé ki ákála mot, fáve ákála Yesukristo ya ákála Tará Nzamá, éñí a ngá wómo ñí míwúán été); ²ya é bóbédzaŋ bése bé ne bíabe bó; ébe bíkóánn bebwíni bíye á Galasia: ³Mvɔmm ya mína, ya é mvwaá é Tará Nzamá wea, ya Ntí Yesukristo, ⁴éñí a ngá vé émyen ákála mísémm myea, á mfá ye ná á koro bía ébe mbéa tám ñí, amvála nkómánn é Tará Nzamá wea ó ne, ⁵éñe á tɔbɔgé ya dúmá kómm ya kómm. Amén.

É mbamba fwéñ a ne mbóó ya mbóó

⁶Ma yágán ya ábímm avóó míní lík yaá éñí a ngá lwée mína ébe é mvɔmm Kristo, ná mína bee mbamba fwéñ mfé, ⁷é sés ná mfé a ne, fáve ná bot benziŋ ébó bá nzaman mína, béé kómo fe tsén é mbamba fwéñ Kristo. ⁸Ve atwaa bía, ngé ki ángel enziŋ ye á dzóp aa kat mína é mbamba fwéñ aa selan ya éñí bí kat yaá mína, mot te á tɔbɔgé ya biboŋ. ⁹Ámvála bí tára yaá mína dzó, ma bera dzó éndagá ná: Ngé mot enziŋ aa kat mína é mbamba fwéñ aa selan ya éñí míní ñoŋ yaá, mot te á tɔbɔgé ya biboŋ.

¹⁰Amú ná éndagá, ye é mvéáñ bot ye éñí Nzamá, fé ma dzéŋ? Ye ma dzéŋ ná bot ébó bé yén ma mvéáñ? Ngé me ngén ma dzéŋ ná bot ébó bé yén ma mvéáñ, me sés fe óloá Kristo.

É mbamba fwéñ a ne kaa ayeŋŋ

¹¹Á bóbédzaŋ, ma kómo ná mína yem ákála dzé, é mbamba fwéñ me ngá kat mína a sés éñí mot binam. ¹²Amú ná meé ndzí ñí áñoŋ ngé ki áyága ñí ébe mot, fáve ná ya nléránn Yesukristo. ¹³Amú ná míní wók yaá ámvála me ngá niŋ éyoŋ me mbé á nyébé bejudio, ámvála me ngá bíra dzéŋ ékóánn bebwíni Nzamá ásí, meé kómo dɔ tsam. ¹⁴Éde, á nyébé bejudio á mfá ábíra

dziŋ ámvúgá bímvámvámm, me ngá lot abwiññ bot béye á myee wɔm, ébá béye é sí dam. ¹⁵Ve, é Nzamá a ngá tɔp ma amvála etámm atéé ye ábum naná, éñe fe aá lwée ma ya é mvɔmm deñ; ¹⁶niané a ngá yén mvéáñ ye álére é Mwán weñ ébe ma, á mfá ye ná me kat é mbamba fwéñ weñ ébe meyoŋ mefé, meé ndzí dzíga áke ásílí ntétéá mot binam enziŋ; ¹⁷meé ndzí ki bét á Yerusalen, á mfá áyén ébá bé ngá tára ma ábo baapostol ósú; fáve ná, maá ke Arabia, me bera fe búlán á Damasko.

¹⁸Véa, nia mibú mí léa me bét á Yerusalen, á mfá a vé Pedro ayemann, ané me ngá tɔbo bía ñí awóm melú ya melú mé tán. ¹⁹Ve meé ndzí yén mbɔ́o enziŋ mfé ye baapostol, fáve Jakobo, Ntí mwanñan. ²⁰Ébe édí ma tsili mína, dággán ná ósú Nzamá, mää bo mineá. ²¹Nia véa, me kéñ á meberŋ mé sí méye á Siria ya Silisia. ²²Ve bíkoánn bebwíni Kristo býe á Judea bíí ngá yem ma ó mís; ²³béé wók fáve ná, éñí a ngá dzéŋ bía ásí métám ó mvús, éndagá á nga kat yaá mbamba fwéñ ye á mbwínánn a ngá kómo tsam métám ó mvús. ²⁴Bá bé nga vé Nzamá dúmá ébe ma.

Baapostol bá yébe Pablo énzénzəŋ deba

2 ¹Éde véa, nia awóm mibú ya mí nii, ané me ngá bera bét á Yerusalen bía Bernabé, meé ke fe ya Tito. ²Maá bét ákála nléránn dzam ye á nsísím, éde ébá bé mbé ya ewógá, me ngá kaŋle bó évwíñ, é mbamba fwéñ ma kat á meyoŋ mefé été, á nza bo tám enziŋ ná ma bo eséññ ngé ki ná me bo yaá eséññ á nzeze. ³Ve atwaa é Tito á mbé bía ñí, ñí béé ndzí ki áyemele ya ñí ná á tɔbo nkíkɡán akeé, afáŋbo ná a mbé mwann griego. ⁴Éde ákála é bɔbédzaŋ meduk bé ngá ñíí á nsámá été áswéññ, béé nzu ñíí áswéññ ná bá mómɔ étɔ́ɔ filí bí belé ébe Kristo Yesus, á mfá ye ná bé tɔ́ɔ bía mikómm [míye á nkɔ́ɔ metsiŋ], ⁵ébá béte, bíí ndzí bó vagle ávé afóo tám enziŋ ná bía bee bó; á mfá ye ná bébélá ye á mbamba fwéñ á tɔbo ébe mína. ⁶Ya ébá bé ngá lán ná bé belé ewógá ye ná bé ne dzóm enziŋ (édí bé mbé, mää bís ki; Nzamá a sés obea ngamm); amú ná ébe ma, ébá bé mbé ya ewógá béé ndzí ma yágale dzam enziŋ ye é ne mfefeñ. ⁷Ve ñí a tɔ́ɔ ná, niané bé ngá yén ná baá téle ma á mfá mbamba fwéñ ébe ébá bé ne kaa nkíkɡán akeé; amvála ané Pedro ñí ya éñí ébá bé ne nkíkɡán akeé. ⁸Amú ná éñí a ngá bo eséññ apostol á mfá Pedro ébe ébá béye á nkíkɡán akeé, aá bo fe eséññ á mfá wɔm ébe meyoŋ mefé. ⁹Éde Jakobo ya Pedro ya Juan, ébá bé ngá lán ané mekon, niané bé ngá ñú tán é mvɔmm Nzamá a ngá vé ma, ané bé ngá ñɔŋ ma ya Bernabé amvála ané bébo biséññ ntéññ mbɔ́o ané ébɔ́, á mfá ye ná bía ébe meyoŋ mefé, ébɔ́ bá ébá béye á nkíkɡán akeé. ¹⁰Éde bé ngá dzaa bía fáve ná bí síman mitétéññ, édí te fe ma me mbé me belé do abwiññ nkómánn ye ábo.

Pablo aa kat fwéñ míkéá bá Pedro

¹¹Ve niané Pedro a ngá sian Ántiokia, ané me ngá vé ñí mbámm ású ya asú, ákála ná édí a ngá bo déé mbé mvéáñ. ¹²Amú ná kaa ná bot benziŋ

béye ébe Jakobo bé sian, a ngá bɔ eé dzí bábe bot béye meɣɔŋ mefé; ve niané bé ngá sian, á nga dulugan áɔɔɔ nkánán, eé kɔ ébá béye á nkíkɣán akeé wɔŋŋ. ¹³Éde béjudio bevɔɔ bá bé ngá sajan fe ya ní ébe meduk méte été; akekwiń ná atwaa Bernabé ní ya bé nga dulu fe ya meduk meba. ¹⁴Ve niané me ngá yén ná bée ngá wulu tételé á mfá bébélá ye á mbamba fwéń, ané me ngá dzó Pedro ósú bot bése ná, “Ngé wa, o tɔɔ mwann judio, wa niŋ amvála ané mot ye á meɣɔŋ mefé, se ané mwann judio, akála dzé wa yémle bot béye á meɣɔŋ mefé ná bé niŋ amvála ané bwann bejudio?” ¹⁵“Bía, bibíbyála béjudio, se amvála ané bot béye meɣɔŋ mefé bé ne bebo misémm; ¹⁶ve bá yem ná mot a sés tɔɔ nzósoó ákála ádzálá é mam nkɔɔ metsiŋ wá mánan, fáve ákála mbwínánn ébe Yesukristo; bía bí bwíni yaá fe Kristo Yesus, á mfá ye ná bí tɔɔ benzósoó ákála mbwínánn ébe Yesus, se ákála ádzálá é mam nkɔɔ metsiŋ wá mánan; amú ná mot enziŋ áá ye tɔɔ nzósoó ákála ndzálánn ye é mam nkɔɔ métsiŋ wá mánan.” ¹⁷Ve ngé bía dzéŋ ná bí tɔɔ benzósoó ébe Kristo, bía bí koan yaá fe ya bía bébyen ané ébɔ bebo misémm. Ye Kristo a ne mvwála bíséńń ye á nsémm? É sés bɔban amvála enziŋ! ¹⁸Amú ná ngé ma bera lɔŋ é mam me ngá tsam, mámyen me bɔ yaá ntsam metsiŋ. ¹⁹Amú ná, mámyen, ákála atsiŋ, me wú yaá ébe atsiŋ, ná me niŋ á mfá Nzamá. ²⁰Me tɔɔ yaá nkelann á krús bía Kristo. Éde éńí aa niŋ a sés fe ma, ve ná Kristo éńe aa niŋ ébe ma; éniŋ ma niŋ mison éndagá, ma niŋ dɔ ya mbwínánn ébe é Mwán Nzamá, éńí a ngá dziŋ ma, ané a ngá vé fe émyen ákála dam. ²¹Máá tep é mvɔmm Nzamá, amú ná ngé nzósoó aa sɔ ébe ákála nkɔɔ métsiŋ, véa Kristo áá wú á nzeze.

Bá ñɔŋ Mfúfup Nsísim fáve ya mbwínánn

3 ¹Á akúkút bwann begalata! Nzá a mana yaá mína dzí nlém [ná mína táa bɔ bébélá mewók], mína é bot é mís menan, bé lére yaá Yesukristo éndendaŋ nkelann á krús? ²Édí etámm édo ma kómo yem ébe mína ná, ye mínaá ñɔŋ Nsísim ákála ádzálá é mam nkɔɔ métsiŋ, ngé ki ya ákála ábéa ya mbwínánn? ³Nde míni ne akúkút aaná? Míni ngá tara ya Nsísim, ye ná mína ke súgan éndagá ya nguu mot binam? ⁴Ye ná míni ngá mana dzuk ébe ábímm mam dí á nzeze? Ngé dá e ne ki bébélá ná dá bɔban á nzeze! ⁵Éde, é Nzamá aa vé mína Nsísim, eé bɔ fe biwólo bí mam énzénzaŋ denan, ye aa bɔ dɔ ákála ádzálá nkɔɔ métsiŋ, ngé ki ákála ábéa ya mbwínánn?

⁶Néa éńe Abraam a ngá bwíni Nzamá, ané bé ngá lán ní dɔ ané nzósoó. ⁷Ya dzam te, yemɣán ná é bot bé ne ébá béye á mbwínánn, ébɔ bé ne é bwán Abraam. ⁸Amú mitsili míf tara lére ná Nzamá aa ye tɔɔ meɣɔŋ mefé nzósoó ákála mbwínánn, éde ósúá a ngá tara kat Abraam mbamba fwéń ná, ‘Meɣɔŋ mése ma ye ñɔŋ abwará ébe wa.’ ⁹Édo ná é bot bé ne ébá béye á mbwínánn, bé belé abwará ya mbwínánn Abraam.

¹⁰Amú ná é bot bése bé ne á nkɔ́ metsiŋŋ ásí, bé ne biboŋ été, akála e ne ntsilann ná, “Biboŋ ya éñí áse aa bɔ kaa laŋan ébe é mam mése mé ne ntsilann ábá nkɔ́ metsiŋŋ été, á mfá ye ná á dzálá mɔ.” ¹¹Dá é tɔ́ ná, mot enziŋ áá ye tɔ́bɔ nzósoó ósú Nzamá akála nkɔ́ metsiŋŋ. É ne été ná, “Nzósoó mot aa ye niŋ akála mbwínánn.”

¹²Ve nkɔ́ metsiŋŋ wáá sɔ́ á mbwínánn; fáve ná, éñí aa dzálá é mam má, aa ye niŋ akála émɔ. ¹³Kristo ñí aá koro bía ébe biboŋ bíye nkɔ́ metsiŋŋ été, niané a ngá veŋan biboŋ akála dea. Amú e ne ntsilann ná, “Éñí áse a kele élé a ne biboŋ,” ¹⁴á mfá ye ná ébe Kristo Yesus ábwará Abraam é nzu ébe meyoŋ mefé; ná bí ñoŋ ngáá Mfúfúp Nsísim akála mbwínánn.

Ngaá da lot nkɔ́ metsiŋŋ

¹⁵Á bɔ́bédzan, ma kɔ́bɔ ané mot binam ná, elat, atwaa e ne édí bot, niané é tɔ́bɔ yaá ntélán mot enziŋ a sés dɔ́ tsam, ngé ki ákɔ́gle dɔ́ dзам enziŋ áyóp. ¹⁶Édo ná, bá vé Abraam mengaá, ya fe é mvoŋ dzeñ. Dáá dzó ná, “Ya memvoŋ mwe,” amvála ané ngé mé ne abwiññ, fáve ané mvoŋ fɔ́. “Ya ébe é mvoŋ dzwe,” édo e ne Kristo. ¹⁷Édí ma kɔ́bɔ édo dí ná, nkɔ́ metsiŋŋ ó ngá tɔ́bɔ ntélán, niané mibú mitet mí nii ya mibú mewóm mé léa mí ngá lot, wáá tsam élat Nzamá a ngá tára tɔ́, amvála ané ngé dá bɔ́ ngaá te kaa eban. ¹⁸Amú ná, ngé tsígá eé tsinibe akála nkɔ́ metsiŋŋ, ngé dɛé tsíí ki fe á ngaá. Ve Nzamá ñí aá kee dɔ́ Abraam ya akála ngaá.

¹⁹Éde, amú dzé nkɔ́ metsiŋŋ waá sɔ́? Bá kɔ́gle wɔ́ áyóp akála ntsamann metsiŋŋ, akekwiñ ané é mvoŋ bé ngá vé ya dɔ́ ngaá dá sian. Baáŋgel ébɔ́ bé ngá kalan metsiŋŋ mé tɔ́ nkomann ébe é wéá ntébe nzaŋŋ. ²⁰Éde bá báá téle ntébe nzaŋŋ ngé ngamm e ne fɔ́; ve Nzamá ñí a ne mbɔ́.

Oloá ngé ki mwán

²¹Édo ná, ye nkɔ́ metsiŋŋ ó ne mengaá Nzamá á ngamm áyát? É sés bɔ́ban amvála enziŋ! Akála ná, ngé bé téle nkɔ́ metsiŋŋ ó ne vé eniŋ, ñá mfaŋ nzósoó ngé aa sɔ́ á nkɔ́ metsiŋŋ été. ²²Ve mitsili myá myá mana dzili mot áse á nsémm été, á mfá ye ná ébá bé belé mbwínánn ébe Yesukristo, ébɔ́ bé ñoŋ ngaá.

²³Ve kaa ná mbwínánn ó sɔ́, bí mbé bí tɔ́ ndzilann á nkɔ́ metsiŋŋ été, akekwiñ mbwínánn ó mbé ná ó nkún kwiñ éyéá été. ²⁴Édo ná, nkɔ́ metsiŋŋ éwɔ́ ó ngá baale bía akekwiñ ané Kristo a ngá sian; á mfá ye ná bí ne tɔ́bɔ nzósoó akála mbwínánn. ²⁵Ve eyoŋ mbwínánn wá ó sɔ́ yaá, bía bíí tɔ́ fe ébe mbaale ásí.

²⁶Amú ná mína bése míní ne é bwán Nzamá akála mbwínánn ébe Kristo Yesus. ²⁷Amú ná, mína ébá bése sé míní ngá tɔ́bɔ nduann ébe Kristo, Kristo éñe fe míní bwát yaá. ²⁸Ébe éñe, mwann Judio a sés, ngé

ki mwann griego; ébe éñe, oloá ó sés, ngé ki filí; ébe éñe, fám e sés, ngé ki miningá; amú ná mína bése míní ne ntéññ mbóó ébe Kristo Yesus. ²⁹Édo ná, ngé míní ne ébá Kristo, míní ne fe é mvɔɔj Abraam, beñɔɔj tsígá amvála ané ngaá e ne.

4 ¹Ve ma dzó ná, é tám ñɔɔj tsígá a ngén mɔɔɔj, áá selan ya oloá amvála enziɔ; afáɔɔɔ ná éñe a ne é mása byém bíse. ²Fáve ná ñí a ne é mó bekatátas ya bebaale akúmm, akekwiñ ané é tám éséá a ngá yáán dá kɔk. ³Bía fe ntéññ mbóó, éyɔɔj bí mbé bóɔɔj, bí mbé bí tsíí ané aloá ná bía séan ya metárage mé ámemámm méye éniɔ dzi.

⁴Ve niané e ngá ɔɔ ná tám eé kɔk yaá, ané Nzamá a ngá lóm é mwán weñ, a byála ébe miningá, a byála fe á nkɔó métsiɔɔj así; ⁵á mfá ye ná á koro ébá bé mbé édzweé ye á nkɔó métsiɔɔj así, ná bí ñɔɔj etɔó bwán. ⁶Dá é tɔó ná míní ne bwán, édo Nzamá a ngá lóm ya do á milém myea Nsísim é mwán weñ, éwo wá yónán ná, Ábba! Á Tará! ⁷Édo ná, o sés fe oloá, fáve mwán. Ngé wa o ne mwán, Nzamá ñí a ɔɔ yaá fe wa ñɔɔj tsígá [ébe Kristo].

Kaa ábúlán á nkɔó métsiɔɔj así

⁸Ve ébe é tám ómvús, éyɔɔj míní mbé kaa áyem Nzamá, míní tɔó aloá, míní ngá séan ya é byém ntélán weba bí sés benzamá. ⁹Ve éndagá, mína míní nga yem yaá Nzamá, ádanɔɔj ná, Nzamá á nga yem yaá mína. É ne ɔɔ á yá ná mína bera búlán ébe metárage mé ámemámm mé ne mitéteák ya kaa eban? Ye ná mína kómo bera veɔan aloá? ¹⁰Mína baale mingúrá mí mos, ya mingúrá mengwan, ya mingúrá metám méye mibú. ¹¹Ma kɔ wɔɔɔj ya mína ná, tám enziɔ éséññ me ngá ɔɔ énzénɔɔj denan, dá súgan kaa eban.

¹²Á ɔɔbédɔɔj, ma dzaa mína engóngóó ná ɔɔgán ané ma, amvála ané ma me ngá ɔɔ fe ané mína. Míní ndzí ma ɔɔ dzam enziɔ ye é ne abé; ¹³ve mína yem ná ákálá okwann ye ó ñúu, édo me ngá kat mína ya do mbamba fwéñ éyɔɔj ósúá. ¹⁴Éde afáɔɔɔ ná ndzuúk ye ó ñúu wɔm ó ngá kyak mína, mína míní ndzí ma byana ngé ki átep ma, ve mína mínaá ñɔɔj ma ané ángel Nzamá, amvála ané Kristo Yesus. ¹⁵Édo ná, mésán menan míní mbé míní belé, mé ne ó vé? Ma ma vé mína ngañiá ná, ngé é mbé ɔɔban, ngé mína fon é mís menan ná mína kee ma mɔ. ¹⁶Ye ná ma me súgan yaá veɔan nzínziɔɔj wenan ákálá ákóɔ mína bébélá?

¹⁷Bé belé ya mína abéánn, ve se á mfá mvéáñ; fáve ná bá kómo mína vea ébe bía á mfá ye ná, ébó míní belé ya bó abéánn. ¹⁸E ne fá mbamba dzam ná mot á lére abéánn tám áse ébe é dzam é ne mvéáñ, se fáve éyɔɔj me ne bíabe mína. ¹⁹Á é bwán bam ébá ma bera dzuk ya mitéñ mí myéé, akekwiñ ané mína sian beñá bot ébe Kristo. ²⁰Me ne dziɔ ma tɔɔ bíabe mína áwola dí ébyen, ó véa me tsén kíɔɔ; amú ná me bíra yaá nzaman ákálá denan.

Agar bá Sara

²¹Mína é bot mína kómo tɔɔ á nkɔ́ métsiŋ ási, katgán ma, nde mínáá beá édí nkɔ́ métsiŋ wá dzó? ²²Akála e ne ntsilann ná, Abraam a mbé a belé bwán befám bé beañ; mbɔ́ é mwán oloá miningá, éní mbɔ́ ní ya éní filí miningá. ²³Édo e ne ná é mwán oloá miningá, áá byála amvála ané mot binam a ne. Ve éní filí miningá, ní áá byála ané ngaá e ne.

²⁴Mam méte mé belé efonann enziŋ ébe mélé má nzu. Amú ná ébá bête bé ne bilat bí beañ. Evɔ́, édí ye á nkoó Sinaí, dá byéñ bwán á mfá áloá; éní te éñe a ne Agar. ²⁵Éde véa Agar éñe a ne nkoó Sinaí Árabia; éñe fe a ne é Yerusalen a ne áwola dí, amú ná a ne étɔ́ óloá bábe é bwán beñ.

²⁶Ve Yerusalen ye á yóp a ne filí, éní a ne é naná wea. ²⁷Akála e ne ntsilann ná,

“Á wa, ekom miningá, laagé ya mesán,
éñí áá bé byéñ,
éñí eé ndzí wók mitéñ mi myeé
lɔŋŋe oyéŋá.
Amú ná é bwán é miningá bé ngá lama,
éɔ́ bé ne abwiññ álot ébá éñí á mbé ya nnóm.”

²⁸Ve, á bɔ́bédzaŋ, amvála ané Isaak, míní ne bwán béye á ngaá. ²⁹Ve ntéññ mbɔ́ fe tám te, amvála ané mwán ye ábyálá ébe mot binam a ngá dzéŋ mwán ye ábyálá ye á Nsísim ásí, ntéññ mbɔ́ fe dá bɔ́ban áwola dí. ³⁰Ve Ntsili wá kɔ́ɔ á yá? “Weagé oloá miningá bá é mwán weñ átán. Amú ná é mwán óloá miningá áá ye ñɔŋ tsígá tám enziŋ bá é mwán miningá filí.” ³¹Édo e ne ná, á bɔ́bédzaŋ, bí sés é bwán óloá miningá, fáve ébá miningá filí.

Kristo éñe aa vé filí

5 ¹Kristo áá tɔ́ bía filí á mfá ye ná bí niŋ á filí été. Édo ná, yémŋán nguu étɔ́ filí te été, kaa ábera ábaga mvaba ye étɔ́ oloá.

²Dággán, ma Pablo ma dzó mína ná, ngé mína kíkban akeé, Kristo áá ye ɔ́ ya mína abúánn amvála enziŋ. ³Ma bera dzó é mot áse aa keleben ná, é ne ní mvólá ná á dzálá fe nkɔ́ métsiŋ óso. ⁴Míní kánan yaá mínabe Kristo, mína é bot mína dzéŋ ná bé lán mína ané benzósoó ya nkɔ́ métsiŋ; míní bók yaá á mvɔmm été. ⁵Amú ná bía, ébe Nsísim, bía bíra yana nzósoó oyan ya mbwínánn. ⁶Ákála ná, ébe Kristo Yesus, ané nkíkŋán akeé, ngé ki kaa nkíkŋán akeé, é sés ya abúánn enziŋ, fáve mbwínánn wá sɛ́n ya edziŋŋ.

⁷Míní ngá ke ósú mvéañ. Nzá a dzip yaá mína á mfá ye ná míní táa ɔ́ bɛ́bélá mewók? ⁸Éde edzíp te, dáá sɔ́ ébe é mot a lwée yaá mína.

⁹Oyomm levadura wá wúza ntsura ngúra. ¹⁰Me tɔɔ ya mína mebúnn ébe Ntí ná, mínáá ye belé ósímánn enziŋ ofé. É mot aa ndágle mína, aa ye ñɔŋ akira, a ne bɔ é mot áse ané bɔ.

¹¹Á bɔbédzaŋ, ve ma, ngé nkíkɔ́n akeé éwɔ me ngén ma kat fwéñ, amú dzé bé ngén bá dzéŋ ma ásí? Ngé éñe é bɔ néa, bé vea yaá ekɔp obaá ye á krús. ¹²Ngwáa ngé ébá bá ndágle mína, ngé bá tɔbɔ ki kíkɔ́n.

¹³Á bɔbédzaŋ, amú ná bá lwée mína á mfá étɔɔ filí; ve fáve ná, kaa ábelan ya etɔɔ filí te amvála ané dzam ye ábɔ ya dɔ nsémm; fáve ná, áséan bevɔɔ ya ébá bevɔɔ ákála edziŋ. ¹⁴Amú ná nkɔɔ métsiŋ ōse wá tɔbɔ ndzálánn ébe efíá evɔɔ! “Dziŋɔ́e é mot mbɔɔ ámvála wa dziŋ wámyen.”

¹⁵Ve ngé mína lópban, míní dzíán fe bevɔɔ ya ébá bevɔɔ, tɔbɔgán ya nkée, á nza bɔ tám enziŋ ná, nde míní ŋga dzéan yaá bevɔɔ ya ébá bevɔɔ.

Mibɔann míye á nlém mot binam

¹⁶Akála te édo ma dzó ya dɔ ná, niŋɔ́n ya Nsísim, véa éñe mínáá ye dzálá mikómánn míye á nlém mot binam. ¹⁷Amú ná mikómánn míye á nlém mot binam mí ne Nsísim á ngamm áyát; Nsísim ñí ya a ne fe á nlém mot binam á ngamm áyát. Amú ná bé beañ bête bá síŋán, ya dzam te édo mínáá bɔ édí mína kómo. ¹⁸Ve ngé Nsísim éñe aa wulu ya mína, nkɔɔ métsiŋ wáá dzwée fe mína.

¹⁹Édo ná, mibɔann míye á nlém mot binam myeé léreban éndendaŋ, émyɔ mí; nsémm eveák, mvin mam, nwulann tugá, ²⁰nkaŋann biyemá, mevalan, nzíŋŋ, mitéé, abéánn, olúnn, evínn, nkánán mengamm, bembéa míyébé, ²¹mbéa nlém, áfían meywa, fét nyénánn befám ya biníngá, ya fe é mam mevɔɔ má fonan ya éamá méte; ma vé mína mbámm éndagá, amvála ané me tára yaá mína dɔ ákɔbɔ ná, é bot bá bɔ amvála mam méte, báá ye ñɔŋ édzwée ngómán Nzamá tsígá.

Bibumá bíye é mot aa niŋ á Nsísim été

²²Ve ebumá ye á Nsísim e ne ná; edziŋŋ, mesán, mvwaá, edzíp, esós, añep, mbwínánn, ²³evwévwé nlém, ádzwée nlém; nkɔɔ métsiŋ enziŋ ó sés mam méte á ngamm áyát. ²⁴Ve é bot bé ne ébá Kristo Yesus, bé mana yaá kele á krús nlém mot binam ya bívée bíye á nsémm byeñ ya fe mikómánn. ²⁵Ngé bía niŋ á Nsísim été, bí wulugán fe ákála Nsísim. ²⁶Bí kaa ábɔan benzeze bingúŋ bevɔɔ ya ébá bevɔɔ, bí ŋga sɔŋán bevɔɔ ya ébá bevɔɔ, bí ŋga bɔan fe evínn bevɔɔ ya ébá bevɔɔ.

Ávéan avwálá bevɔɔ ya ébá bevɔɔ

6 ¹Á bɔbédzaŋ, atwaa ngé bé dzili yaá mot enziŋ ébe evuzá enziŋ, mína é bot míní ne bot béye á nsísim, sɔŋan ñí ya nsísim evwévwé nlém; ve wámyen, wa tɔbɔgé fe ya nkée ná wa o nza fe yén mebólé. ²Ábagán míbaga bevɔɔ ya ébá bevɔɔ, néa éñe fe mína dzálá átsiŋ Kristo.

³Akála ná, ngé mot enziṇ aa tém ná a ne dzóm enziṇ, dá e tɔɔ ná a sés dzóm enziṇ, aa duk émyen. ⁴Ve déá, kada mot á fasge mbɔann weñ émyen, véa, aa ye belé édí a ne vága ya dɔ á mfá ébe émyen etámm, ve a táa kánan ya mot enziṇ mfé. ⁵Amú ná kada mot aa ye бага mbaga weñ émyen.

⁶Ve é mot bá vé ayágalé efiá, á vá édí é ne mvéañ é mot aa yágale ñí.

⁷Kaa líkgán ná bé lés ya mína nzenn, mot enziṇ a sés kpógo Nzamá. Akála ná édí áse mot aa beñ édɔ fe aa ye yoo. ⁸Amú ná, éñí aa beñ á mfá nlém mot binam weñ, ébe nlém mot binam te aa ye yoo awú; ve éñe ñí aa beñ á mfá Nsísim, ébe Nsísim aa ye yoo éniṇ e ne mbéámbéa. ⁹Bí táa ki vwat ná bía bɔ mbeṇ; akála ná bía ye yoo ébe é tám dá yian, ngé bía bɔ kaa vwat. ¹⁰Édɔ e ne ná, éyɔṇ ése bí belé afóo bí bɔgán mot áse mbeṇ, ádaṇdaṇ ébá bé ne mvɔṇ bot ye á mbwínánn.

Mélépgá má súgan

¹¹Dággán nzá ámvála bora bikaṇ maá tsili mína ya é wéa wɔm mámyen.

¹²É bot bése bá kómo mína yémle ná míní kíkbán mekeé, bá bɔ dɔ fáve á mfá ó léreban ané bembamba bé bot á bot été, á mfá ye ná bé táa bɔ dzéṇ ásí ákála é krús Kristo. ¹³Amú ná, atwaa é bot bébyen bé ne mikíkgán mekeé, bá báá dzálá ki nkɔɔ metsiṇ; fáve ná bá kómo mína bɔ ná míní kíkbán mekeé; á mfá ye ná bé vága ébe meñúu menan. ¹⁴Ve dá é táa ki bɔban ná me vága, veveé ébe é krús Ntí wea, Yesukristo. Dzam te fe, éniṇ dzí é tɔbɔ yaá nkelann á krús á mfá wɔm, ma fe ntéññ mbɔɔ á mfá éniṇ dzí.

¹⁵Amú ná, nkíkgán akeé ó sés dzam enziṇ, ngé ki kaa nkíkgán akeé, fáve mfefeñ mvelann mot.

¹⁶Éde mvwaá ya nyénánn engóngɔɔ bí tɔbɔgé ébe ébá bésesé bá niṇ ámvála ané atsiṇ dí e ne, ya fe á mfá Ísrael Nzamá.

¹⁷Atéé ye éndagá ya áke ósú, mot enziṇ áá bera ma bɔ sóm, amú ná me бага méndem Yesus ébe é ñúu dam.

¹⁸Á bɔbédzaṇ, é mvɔmm Ntí wea Yesukristo é tɔbɔgé ya nsísim wenan. Amén.